


# LESSON 12

\*March 16 – 22

## Beihun Neilo Biakpiakna



---

### SABBATH NITAAK

**Tu Kaalsung Simding:** Late 134; Isa. 42:10–12; Mang. 14:3; Late 15; 101:1–3; Late 96; Mang. 14:6–12; Johan 4:23, 24.

**Kamngah:** “Ka nuntak laiteng Topa tungah la kasa ding a; Ka hin laiteng ka Pasian phatna la kasasa ding hi” (Late 104:33).

**P**asian hong hehpikhna le Ama vangliatna sungah a khangtoto ihi hiam? Late gelhpa bang mahin i kidot ding thu in “Kei tunga Topa thupha tampite Ama tungah bangci thuk ding ka hi hiam?” (Late 116:12). Topa tungah i cihtak ding pen kuama pelh thei hilo hi. Late sungah Israel mite in minam mawkmawk khat hi lo hi. Pasian bia minam lian khat hi (Late 22:22, 25; 35:18). Hih in bang pulaak hiam cihleh Israel mite in Pasian phat dingin sawlina ngah uh a, namdangten zong Topa hong phat ding uh hi. Banghang hiam cihleh Topa mite in midik hi, ci-in ciaptehna ngah uh a, amaute in Topa bia-in Ama dikna le itna tawh a nungta mite ahi uh hi.

Tua hi-in mihonpite kikhopna-ah Israelte in Pasian phatna a nei ding uh hi. Pasian phatna in biakpiakna khat hi. Hih bangin mihon biakpiakna in mimal (*khat guak*) biakpiakna neu zaw hi, cihna hilo hi. A langkhatah tua bangin mimal biakpiak nate in mihon biakpiak nate a tha khauhsak hi (Late 22:22, 25); tua bangin mimal biakpiakna in mihon biakpiakna tha a guan hong suak thei hi. Tua bangin mihon biakpiak nate in “midikte kikaihkhopna” kici hi (Late 111:1). Thuman mi in Pasian theihelna nei hi (Late 36:10); Pasian in zong amaute a thei hi (Late. 37:18), tua theihna in amaute nuntak khuasak na khempeuh a makaih hi.

\*March 23, Sabbath a ding kiginkholhna in tu kaal lesson sim in.

## Biakinn panin Na Khutte Lamto In

**Simin, Late 134. Koi munah biakpiakna kinei hiam? Topa tungah biakpiakna piakna hangin bang i ngah hiam?**

Late 134 in *Gam.* 6: 24-26 le Late 67:1 sunga Siampi Aaron thupha piakna hong phawksak hi. Thuphate in biakbuk tawh kizopna panin hong luang thuphate hi, ci-in kimu thei hi; Zion panin Pasian mite tungah thupha kipia hi. Hih thuphate in nuntakna nei khempeuh tungah kipia Topa thupha hi. Banghang hiam cihleh Topa in vantung le leitung a Piangsakpa hi. Zion in Pasian omna biakbuk limciing hi; hih mun panin vantung thuphate hong luang hi. Hih mun in Topa in a mite tawh thuciam a bawlna mun hi. Tua hi-in hih mun in hehpihna tawh thuciam bawlha mun hi. Israelte in Topa tung panin hehpihna thupha hamphatna a ngah thei uh hi. Topa thupha a sanna mun hi.

**Simin, Late 18:1; 36:1; 113:1; 134:1, 2; le Late 135:1, 2. Koi bangin a bia mi kipulaak hiam?**

Late sungah biakpiakna a piate in Topa sila, nasem bangin kipulaak hi. “Zan khuavakin Topa’ inn sungah a ding, Topa’ nasemte khempeuh aw, hong pai-in Topa phat un” (*Late 134:1*), cih thu in Levite in zan ciangin biakbuk cingin om ahihna honghilh hi (*1Khang.* 9:23–27) ahihkeileh Levite in sun le zan tatsat lo-in Pasian min a phatna thu kimu thei hi (*1 Khang.* 9:33). Bang hang hiam cihleh Israelte in mit tawh a kimu theilo Pasian bia uh hi. Pasian pen milim tuamtuan te pulaak theih hilo hi. Mawhneite in Pasian a biak theihna mun khat hong suak hi. A vanglian mahmah a siangtho Kumpi, Pasian tawh kimuhkhopna mun hong suak thei hi. Amah in thukhunte le thukhamte zong honghilh hi. “Amah in a nungta Suangpi tawh kigenteh hi; mite in hih Suangpi nawlkhin uh hi. Ahi zongin nawlkhin thuak hih Suangpi in inn khuampi khat hong suak hi. Khrih tungtawnin mihingte in biakpiakna pia thei uh hi; amaute biakpiakna in Pasian mai-ah san thamcing biakpiakna hong suak thei hi” (*1 Pet.* 2:4, 5). Hih mun panin a kimu khia thei thu in Thukhun Thak sung a Peter pulaak thute Late in zong pulaak hi. Pasian mite in tu-in a siangtho siampi nam hi-in, Pasian phatna le Topa Zeisu Khrih tungah lungdam ko uh hi; Amah in amaute Piangsakpa le Honpa hi.

**Sawltakte hunlai thu-umte in siampi nasep a sem uh hi. Amaute bang mahin eite zong leitung mun khempeuhah hotkhiatna lungdamna thu kizel sak dingin sapna ngah ihi hi. Hih bangin i sepna-ah koi bangin sepna in muibun pen ding hiam?**

## Topa tungah La thak Sa-un

**Simin, Late 33:3; 40:3; 96:1; 98:1; 144:9; le Late 149:1.** Bang thu pulaak kim ciat uh hiam?

Late sung kipulaak thute lakah “Topa tungah la thak sa ding sawlna thu” kimu thei hi. Tua bangin la thak sak nading a hang thute zong kipulaak hi; Topa in vangliatna tawh kidimin na khempeuh tungah ukna nei Topa ahihna thu hangin Ama tungah la thak sak ding kilawm hi, cih hong mu sak hi. Amah in Piangsakpa hi bekthamlo-in mawhneite a hong Tankhia Pa hi. Galte khut sung le sihna pan suahtakna thu hangin Pasian in a mi Israelte tungah maiph a pia hi. Hih thute hangin la thak sa dingin sawlna ngah ihi hi.

Amah in hehpihna tawh kidimin na lamdang tampi bawl ahih manin la thaksak ding kilawm hi. Tua bangin la thaksakna-ah Topa tungah a thakin ki-apna zong hong suak hi. Amah tawh kizopna thak hong neisak suak hi. Hih thute hangin Piangsak Pa le Kumpipa tungah la thaksak ding kilawm hi. Late sungah “La thak” thu tampi kimu thei hi. Hih la thakte in a lamdang Pasian nasepnate a pulaak hi. Ama nasep lamdang thute hangin Amah phatna la sak ding kilawm hi. Amah in a gim mite tungah suahtakna a pia hi.

**Simin, Mang. 5:9; 14:3 le Isa 42:10-12. La thak tawh kisai bang gen hiam?**

Pasian mi Israelte in Topa tawh kinai takin nungta khawm ahihna kipulaak hi; “Topa tawh a kinai mite” ci-in kiciamteh hi (*Late 148:14*); hih thu in Piansakna thu pulaak hi. Israel in a tuam vilvelin minam hihna khat nei uh hi. Tua hi-a hamphatna le namdangte tawh kibatlohma a nei bang mahun a tuam vilvel masuan zong a nei uh hipah hi; Pasian min phat dingin nungta ding uh hi. Tua hi-in Lai Siangtho in a khang a khang a om thu-um mi khempeuh in Topa phat dingin hong kisawl hi. Honpa in a mite honkhia Pa hi-in amaute in tua sisan tungtawnin hotkhiatna tec i ding uh hi.

“La thak” in cihmah hunin a kisa ngei nailo la hi. Amaute in Pasian hehpihna hangin Ama tungah lungdamna la thak a sa ciat ding uh hi. Hih “la thak” in lametna tuam khat pulaak hi. Mailam hun sungah a hong tung ding Pasian vangliatna pulaak hi. Biakpiakna maan takin biakinn sunga biakna le sumpi piaknate sangin thu thukzaw hi. Tua hi-in “La thak” i gen ciangin Pasian in nisim in a hong kepna, a hong cinnate hangin Amah phatna hi.

**Pasian hongpiak thuphate ngaihsun in. La thak sa ding hi lecin bang la na sa ding hiam?**

## Topa, Na Buk ah Kua Teeng Ding?

### **Simin, Late 15. Pasian mai-ah kuate in biakna pia uh hiam?**

Late in Pasian thukham le kamsangte pulaak thute tomkimcingin hong hilh hi: diktatna, le gamtat zia le tong hoih honghilh hi. (*Thkna. 6:5, Mic. 6:6–8*). Hihte in Pasian zia le tong a pulaak hi. Biakbuk in a siangtho mun hi; a mun bekthamlo-in biakbuk sunga om van khempeuh zong a siangtho vive hi. Siampite a kipan a van zat na khempeuh Topa tungah a ki-apsa hi. Pasian mai-ah i om ciangin siangtho-na kisam ahihna thu kimuthei hi. Israelte siangthona in tangzai mahmah hi. Biakpiak nate a kipan a nuntakna buppi khempeuh in a siangtho ding ahi uh hi. A nuntakna uhah picinna a ngah zawh nadingun Pasian in a thukham a pia hi. Kumpipa' tanu tapa bangin a nuntak zawh nadingun Pasian in lamlak hi. Tua bangin a nuntak uh ciangin amaute in siangthona tawh a kidim thei ding uh hi. Pasian tawh a kizopna-ah siangtho ahih manun midangte adingin zong thupha hong suak thei uh hi.

### **Simin, Late 24:3–6 le 101:1–3. Siangtho cih ciangin a khiatna in bang hi ding hiam?**

Biakpiakna a nei mi in “A kicing lungtang” paubaanna nei lo lungsim kisam hi. Hih in a manpha penpen nunna hi. Hebrew tawh kigelhna-ah “tamim,” “kicing” “bucing” “a kisam om lo” cihna hi. “A hoih lenggah in paubaanna bang mah nei lo, kisiatna nei lo-in a gah limci mahmah cihna hi (*Eze. 15:5*). Ganhingte zong melhemna paubaanna om lo ganhingte bek biakpiakna-ah kizang hi (*Siam. 22:21–24*). “Paubaang lo lungtang” in “a siangtho lungtang hi” (*Late 24:4*) lungsim thutang (*Late 15:2*). Lungsim siangtho in Pasian zong hi (*Late 24:6*) Pasian kiang pan mawhmai-na in a bawl phat nunna hi (*Late. 51:2–10*). Pau baanglo nunna in a nungta Pasian hehpihna le Ama dikna theihtelna panin hong pai hi. Pasian hehpihna in Amah zahtakna le Ama deihna bangin nuntak zawhna hong ngahsak hi. Tua hi-in Topa tawh tatsat lo-a kizopna panin mun tuamtumah hotkhiatna thu a puak thei uh hi. Tua bangin a nungta mi in Topa piak nasep tungah a citakna ahi hi; hih bangin mi in ama deihna a nial thei hi. *Late 15* sunga kipulaak thute in a deihhuai lo thute hi (*Late 15:3–5*). Hih in Pasian maipha ngah nading hi lo hi; ahi zongin Pasian tawh hong khenkhia thei thute i pelh ding kisam ahihna hong mu sak hi.

**Koi bangin i deihtel theihna in Pasian kiang pan hong khenkhia hiam?  
Bang thute pelh ding kisam hiam?**

## NAMDANGTE LAKAH AMA' VANGLIATNA PULAAK UN

**Simin, Late 96.** Late in biakpiakna tawh kisai thu bang teng pulaak hiam?

Biakpiakna-ah Topa tungah lasakna kihel hi (*Late 96:1, 2*); Ama min phatna cihte kihel hi (*Late 96:2*); Ama hoihna pulaakna, Ama liatna pulaakna cihte zong kihel hi (*Late 96:3, 4*); tua banah Ama biakbukah citpiakna cihte vapaipihna zong kihel hi (*Late 96:8*). Biakpiakna tawh kisai hih thute banah Late 96 in biakpiakna bek tham lo-in hotkhiatna thu pulaakna le Topa ukna gam thu midangte tungah pulaakna zong kihel hi (*Late 96:2, 3, 10*). Lasakna, minphatna, le citpiakna cihte in kikhentuam theih hilo a, hotkhiatna pulaakna thu zong kihel hi. Hih thute in namdangte tungah hotkhiatna thu pulaakna zong kihel hi. Bang hangin biakpiakna nei cih thute le midangte tungah hotkhiatna thu pulaakna cihte in "Topa in vangliatna tawh kidim ahihna" a pulaak hi" (*Late 96:4*), bang hang hiam cihleh pasian tuamtumte in kimanna neilo hi; Topa in ahihleh vantungete a Piangsak pa hi (*Late 96:5*). Topa in a mang tawntung hi (*Late 96:10*), "Amah in leitung thukhen dingin a hong pai hi (*Late 96:13*). Hotkhiatna thugen mungtupin mihing khempeuh Topa sung ah kipumkhat ding, kilom khat ding ahi hi. A tawpna-ah minam khempeuh in Topa a bia ding uh hi (*Late 96:11–13*).

Topa in Kumpi, Thukhenmangpa, Piangsakpa hi, ci-in theihtelna hi (*Late 96:5, 10, 12, 13*). Biakpiakna sungah abeisa hun a Pasian nasepnate phawkna le na lamdang a Piangsak Pa hi, ci-in theihtelna le mailam hunah a sepding thute lametna (leitung bei ciangin thukhen ding le van thak le lei thak bawl ding ahihna) theihna zong kihel hi.

Late sunga thukhen nate in Pasian in vankhuanuai khempeuh ah daihna, thutanna, nopsakna hong tungsak kik ding ahihna a pulaak hi. Gimna dahna khempeuh a bei hun hongtung ding lamenin i ngak hi. Leitung in Pasian thukhenna hangin kipakin a om ding hi (*Late 96:10–13; 98:4–9*). Topa in thutanna tawh thukhen ding hi, cih honghilh hi. Sianthona tawh Amah i bia ding hi; lingin lau-na tawh biakpiakna lophawh bawl ding hilo hi (*Late 96:9*). Biakpiakna-ah lungdamna, khamuanna zong kihel hi (*Late 96:1, 2, 4, 11–13*). A siangtho kihtakna le lamdangsakna tawh Pasian bia ding ihi hi (*Late 96:4, 9*). Vankhuanuai khempeuh a hong sapna-ah mi khempeuh in Piangsakpa bia ding ci-in thu hongpia hi; Amah in leitung Thukhenpa hi. Hih thu leitung mun khempeuh ah a nunung bel gospel pulaak ding ihihna a pulaak hi. Hih sungah vantungmi thumte thupuak *Mang. 14:6–12* zong kihel hi. Late in lampi tuamtum tawh leitung hun bei kuan a pawlpi thupuak: piansakna, hotkhiatna, biakpiakna le thukhenna cihte kihel hi. I thu guiletpite a kihel suak hi.

**Late pulaak thute le Vantungmi thumte thupuak (*Mang. 14:6–12*) enkak in. Koi bangin leitung beikuana i thupuak thute pulaak hiam?**

**THURSDAY**

*March 21*

## **Biaknate'n Pasian Lungkimna a ngahlooh Ciangin**

**Simin,** Late 40:6–8; 50:7–23; le 51:16–19. Hihte in a thupi bang pulaak uh hiam? Bang hangin Pasian in tua bang biakpiaknate-ah lungkim lo hi ding hiam? (*Pai.* 20:24)

Kamsangte bang mahin Late gelhpa in biakpiakna kizatkhialhna thute pulaak hi. Topa thupiak bangin Israelte biakpiaknate panin lampialna thu hilo zaw-in tua bang biakpiaknate banghangin kisam cih thu a kin lohnate hangun mawhpaihna kimu thei hi. Amaute biakpiakna le thu upna in kigamla ahihna kimu thei hi. Pasian in a mite biakpiakna, meihal biaknate hangin mawhpaih na a pulaak hilo hi. Amaute gitlohnate le a nuntakna uhah thutanna lohnate hangin Pasian in mawhpaihna thu a pulaak hi (*Late 50:8, 17–21*). Hih Late in biakpiakna le kipiaknate langpanin thuhilhna hi. Banghang hiam cihleh amaute biakpiakna in a mawk napi, a hawmpa hi. Hih bang thute in amaute nunzia tungtawnin kimu thei hi. Biakpiakna le nunzia kipumkhatna a kisiat ciangin biakpiakna a nei peuhpeuh in Topa tawh kinai zaw-in a kalsuan ding kisam mahmah hi. Cihnopna-ah biakpiakna in tua bangin biakpiakna tawh lungkim ding hilo hi. Biakpiakna pulaak, a mungtup i batzawh ding kisam hi. Tua in thu dang hi lo-in biakpiakna in Pasian hong musakin Amah tawh hong kinai takin nuntak khopna hong tunpih ding hi.

**Simin, Johon 4:23, 24. Zeisu in bang thu pulaak hiam? Tua thu in tulai tuhun adingin Late pulaak thu tawh kibang hi lo hiam?**

Kipiakna bekin kicing nailo hi. Tua bangin piakpiaknate in mawh kisikna, upna le mawhna hangin dahna, kisikna a om keileh khitna neilo biakpiakna suak ding hilo hiam? Tua hi-in i biakpiaknate in mawh kisikna, Topa tungah lungdamna tawh a kithuah ciangin Pasian mai-ah a san thamcing biakpiakna hong suak theibek hi; tua ciang bekin “dikna tawh biakpiakna suak thei bek hi” (*Late 51:19; 50:14*). Zeisu in Isaiah siksatin a pulaak thu in: “Hih mite in a kampi bek uh tawh kei hong zahtak bawl uh a, ahizongin alungsim taktak uh kei tawh kigamla hi” (*Matt. 15:8*). Late pulaak gimna buai-nate mah Zeisu in zong a phukha a thuak kha hi. A diakdiakin Zeisu in hihleitung ah a hong nuntak sungin biakna makaite tawh maitang kituahna-ah tua bang thute a phu kha hi.

**Adventist thu-um mi khat ihihna tawh koi bangin siatna sung tung lo-in kalsuan thei ding i hiam? A kipulaak thute in biakna le Pasian maipa ngah nadingin kicing hi lo hiam?**

**Ngaihsutbeh Ding:** E. G. White, *A Call to Stand Apart* laimai 39–42, “How to Pray” simin. Biakpiakna tawh kisai-in mawhna kisik ding thupi mahmah hi: Mawhna kisikna sungah mawhna hangin dahna le mawhna nusia-in Topa lamah kilehkikna zong kihel hi. Mi tampite in mawhna hangin amau thuak ding gimnate kihta le lau-na hangin mawh kisik uh hi. Ahizongin Lai Siangtho honghilh mawh kisikna in tua bang hilo hi. Lai Siangtho tawh kituak mawh kisikna-in, Pasian tungah khial ahilham kiphawkin a mawhna, tat khialhna hangin kisikna in Pasian deihna hizaw hi.

Esau dahna in a ngah ding gamh tawh kipelh ahih manin kisik hi. Balaam zong a lampi-ah namsau tawi vantungmi amuh ciangin lau-in, a khialhlam kiphawkin kisik hi. Hihte in kisikna maan hilo hi; gim thuakding lau-na hang a kisikna hi. Kikhelna lunggulh taktak nailo uh hi. Judas Iscariot zong a Topa tungah a ciampel ciangin ‘Mawhna neilo mi khat tungah ka khial kha hi.’ *Matt. 27:4.*”—Ellen G. White, *Steps to Christ*, pp. 22, 23.

“Pasian in mihingte bawl tawm biakbukte, biakinntre sungah hong teenglo himah taleh Amah a bia mite’n Pasian a biak uh ciangin amaute lakah hong teeng hi. Topa bia dingin hongpai mite in siatna, mawhna kici peuhmah hemkhia ding uh hi. Thuman le Kha Siangtho le Topa sianthona tawh a bialo mi peuhmah biakpiakna in kimanna a neilo suak hi. Tua manin Topa in hih bangin a pulaak hi: “Hih mite in a kampi bek uh tawh kei hong zahtak bawl uh a, ahizongin a lungsim taktak uh kei tawh kigamla hi. Mihingte’ bawltawm thukhamte, Pasian’ thukham zahin mite tungah hilh uh ahih manin kei hong biak hangun a kimanna omlo hi,’ ci hi.” *Matthew 15:8, 9.* “Topa a bia mi peuhmah in thuman thutak le Kha Siangtho tawh a zong ding hi. *John 4:23.*”—Ellen G. White, *Prophets and Kings*, p. 50.

### Kikupding Dotnate:

- ① Biakpiakna-ah a lian penpen piakhietna in bang hiding hiam (*Late 40:6–10; Rom. 12:1, 2*)?
- ② Koi bangin mimal le mihon biakna kozopna nei hiam? Bang hangin mimal biakna le mihon biakna kisam tuaktuak i hi hiam? Koi bangin hih thu nihte gel thahat tuakin tonkhawm thei ding hiam?
- ③ Mi tampi in biakpiakna i gen ciangin thungetna, Pasian min phatna, Lai Siangtho thusinnna le biakna tawh kisai laisim bekin ngaihsun khialkha uh hi. Biakpiakna i cih in hih bangte ciang bek tawh kiciangtan thei ding hiam? Biakpiakzia nam tuamtuanthe pulaak in.
- ④ Ellen G. White in, “Ama na’ sepna in lungkiat ngaihsut ding hilo hi. Pasian biakna i cihin a nuam pen ding ahi hi. Ama nasepna-ah kihelna in lungdamna lianpi hong ngahsak hilo hiam?” *Steps to Christ*, p.17